

ASEAN mampu saingi Eropah

Daripada G. MANIMARAN

CEBU CITY, Filipina 15 Jan. - Datuk Seri Abdullah Ahmad Badawi yakin ASEAN yang genap empat dekad tahun ini mampu muncul sebagai wilayah pembangunan kukuh berbanding Eropah jika berupaya menggunakan sumber yang ada termasuk jalinan kerjasama negara dialog dari Asia Timur.

Ketika bercakap kepada wartawan pada sidang akhbar di akhir Sidang Kemuncak ASEAN Ke-12 dan siri sidang kemuncak susulan, Perdana Menteri memberitahu, rantau ini mampu muncul sebagai wilayah ekonomi yang lebih kuat berbanding Kesatuan Eropah (EU), yang kini jauh maju berbanding ASEAN.

"Negara-negara Eropah memang hebatlah lagi daripada kawasan kita. Potensi yang ada itu ialah wilayah Asia Timur boleh menjadi lebih hebat lagi daripada wilayah EU.

"Tetapi ini bergantung kepada sejauh mana kita bersedia untuk bermuafakat dan bekerjasama meskipun berhadapan dengan cabaran-cabaran tertentu," kata beliau di sini hari ini.

Menurut Perdana Menteri, tahap kerjasama antara negara ASEAN bertambah baik dan ia diperlihatkan menerusi hasrat pemimpin negara-negara rakan dialog kali ini yang cukup tinggi untuk melihat tahap kerjasama menjadi lebih erat.

"Negara-negara sahabat seperti India, China dan Jepun lebih tinggi hasrat untuk bekerjasama.

"Negara-negara sahabat melihat hubungan dengan ASEAN sebagai hubungan strategik, satu hubungan yang produktif untuk membolehkan India dan negara-negara lain mendapat manfaat," katanya.



UM - 16/1/2007

**SIDANG
KEMUNCAK
ASEAN KE-12
CEBU, FILIPINA**

Bagaimanapun beliau mengakui masih terdapat cabaran yang perlu dihadapi oleh negara anggota ASEAN.

Dua cabaran utama ialah ketidakseimbangan kemajuan ekonomi dan soal kemiskinan, jelas Abdullah.

Antara dokumen ditandatangani kali ini ialah Deklarasi Cebu Ke Arah Komuniti Penyayang dan Muafakat Bersama, Deklarasi Cebu Mengenai Rangka Tindakan Piagam ASEAN dan Deklarasi Cebu Menangani Keganasan.


Selepas Sidang Kemuncak ASEAN Ke-12 yang berlangsung kelmarin, Sidang Kemuncak ASEAN+3 dan sidang kemuncak berasingan membabitkan China, Jepun, Korea Selatan dan India dan Sidang Kemuncak Asia Timur (EAS) Kedua turut diadakan.

Sidang Kemuncak Pertumbuhan ASEAN-Brunei, Indonesia, Malaysia dan Filipina (BIMP-EAGA) dan Pertumbuhan Segi Tiga Indonesia-Malaysia-Thailand (IMT-GT) juga berlangsung.

Kesemua sidang kemuncak itu yang dihadiri 16 pemimpin negara dan kerajaan berakhir hari ini.

EAS hari ini meluluskan Deklarasi Cebu Mengenai Jaminan Tenaga Asia Timur yang merangka kerjasama untuk tidak bergantung kepada bahan api konvensional, sebaliknya mahu melipatgandakan usaha memperbaharui tenaga.

Ketika mengulas signifikan deklarasi itu,



ABDULLAH Ahmad Badawi berbincang dengan rakan sejawatannya dari New Zealand, Helen Clark di Pusat Konvensyen Antarabangsa Cebu, Cebu City, semalam.

- Bernama

Perdana Menteri berkata, usaha tersebut akan banyak memanfaatkan Malaysia dalam jangka panjang dan kerajaan akan mengambil tindakan-tindakan susulan selari dengan kandungan deklarasi tersebut.

"Dengan itu kerjasama Malaysia akan menjadi kerjasama aktif. Kita mahu melibatkan ahli-ahli sains dan (pakar) teknologi dari Malaysia," katanya.

"Telah dipersetujukan dalam peringkat

ASEAN dan negara EAS bahawa ia (akan) banyak memberi manfaat kepada negara kita, sama ada dari segi kerjasama ekonomi, sama ada dari segi kerjasama sains dan teknologi, penyelidikan dan pembangunan.

"Usaha untuk muafakat kerjasama bagi menjamin atau memastikan jaminan tenaga adalah menguntungkan negara kita," kata beliau lagi.

- Utusan